

AL PAPE ZUAN PAULI SECONT PAL RICOGNOSMENT DAL DIRIT DI DOPRÂ LA NESTRE LENGHE

Benvignût in cheste nestre tiere; une tiere di popui e di culturis diferentis, ma cuntune sole fede.

Nô, int de glesie furlane erêt di Aquilee, che si è cjatade a evangelizâ popui di lidrîs latine, todescje e slave, Lu ricevîm cui nestris Sants, il Patriarcjât, la glorie e i patiments: misteri de fede incjarnade tai secui.

Lu ricevîm come segn di unitât te glesie e di comunion des glesiis. In chest spirt o scrivîm, animâts di Vanzeli e di fiducie.

O sin contents che Lui, piligrin pal mont, al insemi simpri, in ogni puest e ocasion, il rispjet e l'amôr che la glesie e à di vê pai dirits de persone e dai popui.

Pape Zuan Pauli, il so magjisteri al è a pro dai popui no-ricognossûts; Lui al predicje di un continuo che «no je pâs cence rispjet pes minorancis». Jenfri chestis o sin ancje nô di marilenghe todescje, slovene e furlane.

E je cheste la nestre realtât di piçui dal Vanzeli denant dai grancj dal mont.

O savîm che il So pinsîr e la Sô preiere a son par che la fede e deventi lûs, sâl e vite inte storie di vuê. Chest proget nô lu sintin une vore impuartant pe nestre realtât. O stin di fat passant un moment di tentazion e di prove.

Il sintiment, il criteri, la sapience di vite a clopin ca e là. Gnûfs modei culturâi a jentrin, cence jessi stazâts, intal mût di vivi di vuê. Intant si piert la memorie dal passât, si sbandin lis fameis, si ven splanâts, al cole il gust de vite.

Chest al sucêt ancje parcê che o sin stâts e o sin ore presint ferîts te nestre identitât. Se no si è sè stes, si devente nissun.

Culî nus vegnin dineâts dirits di fonde de persone e dai popui. Al baste ricuardâ che nus è im-proibît doprâ il furlan te scuele, tai conseis, tai ufizis e tai tribunâi. Chest al vâl ancje pai todescs e in buine part pai slovens. Un tâl dirit nus ven dineât oficialmentri ancje inte Messe a no cristians di marilenghe furlane, cundut che o vin bielzà par furlan la Bibie, il Messâl, i cjants, dute une tradizion catechistiche, e ancje se i nestris vescui a àn plui voltis domandât il ricognosment di chest dirit a lis autoritâts competentis.

Si lei intes costituzions de ultime Sinode de glesie di Udin: «Il Friûl al è tiere di incuintri, parte vierte fra Orient e Ocident, risulte des trê culturis di fonde che a stan intes lidrîs da l'Europe: latine, todescje e slave. (...) Inte lenghe, il Friûl al palese la sô specifiche identitât etniche e culturâl» (Cost. Sin. n. 3).

Pape Zuan Pauli, il ricognosment dal dirit di doprâ la nestre lenghe in dut e par dut scomençant de Messe, e je peraule profetiche e il miôr segnâl di rispjet pai popui, che Lui al pò lassâ in Friûl.

Che ancje midiant di Lui, Crist al dedi spirt ai piçui dal Vanzeli.

Che la fede e vedi culî il savôr di cheste tiere e che Aquilee e puedi jessi ancjemò mari e lusôr dai nestris popui.

A glorie di Diu, pal ben nestri e di dute la sante glesie.

Mandi.

Lu compagni la pâs di Gjesú Crist.

Friûl, 1 di novembar 1991 - Fieste di ducj i Sants.

Promotôr:

Comitât pal ricognosment dal dirit di doprâ in Friul lis lenghis furlane, todescje e slovene

Il cordenadôr: Pressac Zuan Borc di Miec, 15 33030 Turide (UD)